

समा. 09.20 Hrs

# Headlines

- एशिया कप क्रिकेट 2025 च भारत दी पाकिस्तान पर शानदार जित, राष्ट्रपति द्रोपदी मुरमू होरें टीम इंडिया दी सराहना कीती, प्रधानमंत्री मोदी होरें आखेया जे खेड दे मैदान पर बी ऑप्रेशन सिंदूर आहला लेखा नतीजा भारत दी जित रेहा।
- उपराज्यपाल मनोज सिन्हा होरें कठुआ च निवेशक सम्मेलन च हिस्सा लेया, रासपूजी लाने लेई जम्मू-कश्मीर दे साजगार माहोल ते क्षमता गी उजागर कीता।
- एल.जी. होरें बसोहली उत्सव दा उदघाटन कीता, आखेया जे भारत दी बधदी आर्थिक क्षमता, एहदी संस्कृति, कला ते परम्परा कुल संसारी सतह पर पंछान हासल करा रदियां न।
- जम्मू-कश्मीर दियें दंडु असैम्बली सीटें बडगाम ते नगराटा लेई उपचुनां- नवम्बर च बिहार विधानसभा चनाएं कम्मै होने दी मेद, खाली पेदियें इनें सीटें लेई चुना आयोग आसेया निगरान तैनात।
- मिथुन मन्हास बने BCCI दे 37में अध्यक्ष जम्मू-कश्मीर लेई मानै आहली गल्ल ते डुग्गर दा सपूत निविरोध इस ओहदे लेई चुनेया गया।

<><><><><><>

## Asia Cup Cricket

एशिया कप टी-20 क्रिकेट-2025 टूर्नामेंट दे खिताबी मुकाबले च भारत नै पाकिस्तान गी 5 विकेटें कन्नै रहाड़्यै 9मीं बारी एशिया कप दा खिताब अपने नां किता ऐ। पाकिस्तान दे 147 रनज दे लक्ष्य दे परते च भारत नै अपनी बारी दे शुरू च गै छड़े 20 रनजें ऊपर 3 विकेटें मोआई दिती दियां हियां। एहदे मगरा तिलक वर्मा ते Sanju Samson दी जोड़ी नै भारतीय पारी गी संभालेया Tilak Verma नै नाबाद नंतर रनजे दी शानदार अर्ध-शतकीय पारी खेड़ी शिवम दुबे नै 33 ते Sanju Samson नै 24 रनज बनाए।

<><><><><><>

President-Congrats

राष्ट्रपति द्रौपदी मुर्मू होरें भारत दी इस शानदार जित लेई टीम इंडिया गी मुबारखबाद दिती ते भविष्य च इयै जनेईएं होर केंई शानदार कामयाबियें दा सिलसिला बरकरार रक्खने दी कामना कीती। प्रधानमंत्री नरेन्द्र मोदी होरें एशिया कप भारत-पाकिस्तान फाइनल दी तुलना ऑप्रेशन सिंदूर कन्नै कीती ते गलाया जे नतीजा ऊए रेया; भारत दी जित, एहदे लेई स्हाड़े खडारियें गी बधाई। तोंआई भारतीय क्रिकेट बोर्ड नै बी दुबई च एशिया कप फाइनल च पाकिस्तान ऊपर भारत दी 5 विकेटें दी शानदार जित दा जश्न मनाया ते इसी मैदान दे अंदर ते बाहर इक प्रभावशाली जित दस्सेया।

<><><><><><>

LG -Investors Meet

उपराज्यपाल मनोज सिन्हा होरें कठुआ जिले दे बसोहली च ICICI बैंक दे सहयोग कन्ने उद्योग ते बपार मैहकमे आसेया लोआए गेदे निवेशकें दे सम्मेलन “इन्वेस्टर्स मीट” गी सम्बोधित कीता। अपने मुख भाषणै च एल.जी. होरें आखेया जे हाल च कीते गेदे ढांचागत विकास ते निवेशक हतैषी नीतियें दी बदोलत जम्मू-कश्मीर रासपूंजी लाने आहलें लेई उत्तर भारत च इक आकर्षक थाहर बनी गेदा ऐ। केन्द्र शासत प्रदेश च आर्थिक विकास ते कम्म रोजगार दे मते-मते मौके पैदा करने दे केन्द्र सरकार दे पक्के धेड़यै दा जिक्र करदे होई मनोज सिन्हा होरें आखेया जे इत्थै उद्योगें गी बड्डे पैमाने पर बढ़ावा देने गितै केन्द्री क्षेत्र दियें स्कीमें तैहत पैहलकदमियें गी विस्तार दिता गया ऐ।

<><><><><><>

LG- Basohli Utsav

जम्मू-कश्मीर कला,संस्कृति ते भाषाणं सरबंधी अकादमी जम्मू दे डिविजनल प्रशासन ते Indira Gandhi National Centre for Arts आस्सेया आयोजित “बसोहली उत्सव” दा उदघाटन उप-राज्यपाल मनोज सिन्हा होरें कठुआ जिले दी बसोहली थाहर कीता। इस मौके पर बोलदे होई उप-राज्यपाल होरें आखेया जे ओह “बसोहली उत्सव” गी कला-संस्कृति ते रिवायतें दे महाकुम्भ आहला लेखा दिक्खदे न। “बसोहली उत्सव” समाज दे हर वर्ग गी चेता दोआंदा ऐ जे भारत दी विशाल ते महान विरासत दे ओ वारिस न। उर्ने आखेया जे भारत दा आर्थिक विकास ते भारत दी संस्कृति-कला ते रिवायतें गी वैश्विक पंछान थोआ रदी ऐ।

उपराज्यपाल होरें 5 प्रकाशन “लोक में राय” “रमायण की स्त्री-गाथा”-“राम का घर”-“राम की संजीवनी” ते “Tribes of Ramayana” जारी कीतियां।

<><><><><><>

Sewa Parv Gatishakli

“सेवा पर्व” श्रृंखला तैहत अज्ज गल्ल पी.एम गतिशक्ति राष्ट्री मॉस्टर प्लान दी जेहदे राएं मुख्यें च ढांचागत विकास च इक क्रांतिकारी बदलाव आवै करदा ऐ। इस योजना तैहत विकास नै सदा थमां मती तेज रफ्तार फगड़ी लैती दी ऐ ते ढांचागत निर्माण दे क्षेत्र च नित नमियां उपलब्धियां हासल कीतियां जा करदियां न। एह मुख्ये दे इतिहास च पैहली बारी ऐ जे 57 मंत्रालय, 36 राज्य ते केन्द्र शासत प्रदेश सब्भै किट्ठै रलियै इक्कै डिजिटल मंच पर कम्म करा रदे न जित्थै इक जहार 700 डेटा परतां एकीकृत होंदियां न। प्रधानमंत्री मोदी हुंदे मुजब गतिशक्ति इक सामे ते समावेशी शासन दा विस्तार ऐ.

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू “सेवा पर्व 2025” दे तैहत अपने विशेष कार्यक्रमें दी श्रृंखला दे इक हिस्से दे तौरा पर अज्ज 25एं मिन्टे दी इक विशेष परिचर्चा प्रसारत करने जा रदा ऐ, जेहदा विषय ऐ- “दफा 370 ते 35ए गी खत्म करने बाद जम्मू खिते च सेहत ढांचे ते सेवाएं च बदलाव”। इस कार्यक्रम च स्हाड़े परौहने होडन नारायणा सुपर स्पेशलिटी अस्पताल, कटड़ा च ऑर्थोपेडिक्स विभाग दे सीनियर कंसल्टेंट डॉ. विकास पाधा जेहड़े इस विषय

दे बक्ख-बक्ख पहलुएं पर अपने विचार सांझे करडन। इंदे कन्नै गल्लबात करडन स्हाड़े न्यूज एंकर श्रुति खजूरिया ते कुणाल श्रीवत्स। एह कार्यक्रम अज्ज दपैहरी 12 बजे स्हाड़े इस्सै चैनल पर मीडियम वेव 303 मीटर यानी 990 किलोहर्टस ते थड 100 इशारिया 3 मैगाहर्टस पर प्रसारत कीता जाहग।

<><><><><><>

ECI -Observers

भारतीय चुनां आयोग मेद ऐ जे बिहार चुना दी घोषणा दे कन्नै जम्मू-कश्मीर दे नगरोंटा ते बडगाम विधानसभा हल्कें दे उप चुनां दी घोषणा बी करै। इक अधिकारिक ब्यानै मूजब चुना आयोग नै विधान सभा दे उप चुना आस्तै केन्द्रीय निगराने दी तैनाती दी घोषणा कीती। चुना आयोग नै 470 अफसरें दी तैनाती दी घोषणा कीती ऐ- जेदे च 320 IAS- 60 IPS ते 90 IRS दी तैनाती शामिल न। इसदा मकसद चुनाएं गी आजाद ते निरपक्ख ढंगै सिर करोआना ऐ।

<><><><><><>

BCCI –Prez Manhas

दिल्ली दी क्रिकेट टीम दे साबका कप्तान मिथुन मन्साह होरें गी भारतीय क्रिकेट कंट्रोल बोर्ड BCCI दा नमां अध्यक्ष चुनेया गया ऐ। BCCI दी सालाना 94मीं आम बैठक च उन्दे नां पर खीरी मुहर लग्गी। ओह बोर्ड दे 37में अध्यक्ष होगन। 45 बरे दे मन्हास रोज़र बिन्नी हुंदी थाहर लैगन। मन्हास होर मूल रुप कन्नै डोडा जिले दी भलेसा थाहर दे इक दूर-दरेडे गां Dossa दे

रौहने आहले न। ओह अज्ज इस मुकाम पर अपनी सख्त मेहनत ते पक्के धेड़यै कन्नै पुज्जे न। तोंआई मन्हास हुंदे जददी गां च इस खबर गी सुनियै पूरे उत्सव आहला माहौल ऐ।

<><><><><><>

## GST –Food Items

जी.एस.टी सुधारे दे बाद जित्थै हर श्रेणी दे उपभोक्ताएं दिये आसैं-मेदें ते सुविधाएं दा ख्याल रखेया गेदा ऐ- उत्थे गै इन्दे शा लाह हासल करने आहलें मते खुश न। खाने-पीने दियां चीजां जियां पिज्जा- ब्रेड- खाखरा ते चपाती गी भलेया जी.एस.टी. मुक्त बनाई दिता ऐ- जिंदे पर पैहले 5 प्रतिशत साब्भै जी.एस.टी लगदा हा। इस्सै चाली पैहले 18 प्रतिशत जी.एस.टी दी श्रेणी आहले पराठा बी एहदे शा पूरी चाली मुक्त करी दिते गेन। इन्नै बड़डे पैमाने पर टैक्स कटोती दा मकसद साफ ऐ लोकें दी जेब पर टैक्सैं कारण पौने आहले बोझ गी घट्ट करना। खाने-पीने आहले होर दुए समेयान जियां जे पैकट चटनियां- प्यूरी-पेस्टां-म्यूनी वगैरा जिंदे पर पैहले 12 प्रतिशत जी.एस.टी लगदा हा उसी घटाइयै हून 5 प्रतिशत करी दिता गया ऐ। आकाशवाणी समाचार कन्नै इस बारे गल्ल करदे होई इक ग्रैहणी रिया दा आखना ऐ.

<><><><><><>

## CEO Kisht –Seva Parv

किश्तावड़ दे मुख् शिक्षा अधिकारी संजय डोगरा होरें चला र'दे सेवा पर्व दौरान चलाई जा र'दी गतिविधियें गी उजागर कीता। उ'नें इस अभियान च हिस्सा लैने आहले स्कूलें दे योगदान दी बी सराहना कीती। उ'नें आखेया जे इस प्रोग्राम दा मकसद विद्यार्थियें गी नशे थवां दूर रक्खने-

इसदे माड़े असर बारे जानकार बनाने- साफ-सफाई बनाई रखने ते युवाएं दे छप्पे दे हुनर गी निखारना ऐ। उनें विद्यार्थिये गी आखेया जे ओह इस दौरान कीती जा रदी गतिविधिये गी अपनी रोजमर्रा दी जिन्दगी च बी अपनान।

<><><><><><>